

PES GNOZZIS  
ZORZENON - PICCININI

BIBLIOTECA CIVICA  
UDINE

MISC. 256.20




BIBLIOTECA COMUNALE

VINCENZO JOPPI

UDINE

N. 72859

255  
29







PES GNOZZIS  
ZORZENON - PICCININI





GIOV. LORENZONI

# LA BATARELE

UN SCHERZ IN DÔI QUADRS



EDIZIONI DE "LA PANARIE" - UDINE  
1930



## PERSONIS :

DONE VERÒNICHE	}	i nuvîz
SAR BLAS		
PAULINE	}	morôs e morose
MASÛT		
SAR TITE, il deàn		
TONI		
CORO, umin e fèminis		

Une piazzute t'une vile dal Friûl. In font la ciase di done Veròniche; a gestre e a zampe altris ciasis. Une strade a gestre che mene in glèsie, une a zampe che si piart vie pe vile. Tal miez de plazze il pòz.

Di matine denànt dí.



# LA BATARELE

UN SCHERZ IN DÔI QUADRI

## PRIN QUADRI.

PAULINE (scovânt denânt la puarte di ciase di done Veròniche):

Ce matrimoni  
disgraziât!  
Qualchi demoni  
lu à cumbinât.

Je and' à sessante,  
lui cinc di plui;  
je à qualchi ciosse,  
strazzòn 'l è lui.

Je i par di sedi  
come di vinc',  
ma, par disgràzie,  
jè senze dinc'.

Lui si strissine  
clopànt clopànt,  
e al s'inzopede  
di quant in quant.

Ce biele cubie!  
Oh, ce biel pâr!  
Oh, ce biel viòdiu  
denânt l'altâr!

Ce matrimoni  
ben stagionât!  
Qualchi demoni  
lu à cumbinât.

(In chest momènt si sint, da lontàn, a ciantà e a bati cialdîrs, covertoris e mastei. Pauline, plene di maravee, sta a scoltà).

PRIN CORO — Nus an' pètje mo' di bielis  
qualchi volte ance l'amôr!  
c'al cumbine matrimonis  
là che propri no 'l ocôr.

SECÒNT CORO — Vin di fàur la batarele  
propri là sot i barcòns;  
vin di bati e bati, come  
quanche sbarin i canòns.

PAULINE — Puare mai me! Momènz tornin  
[di glèsie]

i miei paròns... feliz:  
e cà vegnin a fàur la batarele!  
Sì, che stan frescs chest biel pâr di nuviz.

E mi àn raccomandât, prin di là in glèsie,  
di dispiardi la int,  
se mai tentàs di fàur la batarele.  
E son za donge, son za donge... 'o sint!

Signôr! Ce si fàse  
par fàju là vie?  
Oh, Jesumarie!  
O puare mai me!

Mi clòpin lis giambis,  
i vôi 'e mi balin,  
lis fuarzis mi càlin,  
'o soi fûr di me.

Son cà, son cà!  
'O scuen sciampà!

Son une vore!  
Signôr, ce tanc'!  
Cussí a buinore,  
pizzui e granc'!

Son cà, son cà!  
Ce àò di fà?

(Pauline e s'ciampe vie pe' strade che mene in glèsie. Jentrin i coros, formâz di contadîns e contadinis duc' armâz di cialdîrs, covertoris, mastei. Masùt ju dirêz).



CORO — Primevere benedete,  
mari sante di ogni flôr;  
ance i viei cumò si movin,  
ance i viei van in amôr.

MASÛT — Alegrîs! Duc' in file,  
atênz al miò comànt.  
Cui peste, cui scivile,  
cui fâs il diaul ucànt.  
E ualtris fantazzinis,  
atentis al comànt.  
Spalancait ben la boce,  
ché chest momènt 'l è grant.

CORO — Vègnino? Vègnino?

MASÛT — Vebit paziènzie.

CORO — Quant si scomènzie?

MASÛT — Ma no ancemò!

CORO — Ma dunce, vègnino?

MASÛT — Vebit prudènzie.

CORO — Quant si scomènzie?

MASÛT — Quanche us dîs jo!

(Dute che' int no po stà cuje. Un al ciale di cà,  
un al ciale di là. Infîn un, c'al po sedi ance Toni, al  
clame donge chei altris e ur mostre cu la man da  
bande da glèsie. Segno c'al ven qualchidùn).

CORO (sot vòs) — Vegnin, vegnin! Jé Pauline  
che' che viarz la marce. Olà!

MASÛT — Si vicine, biel cidine...

CORO — Si scomènzie?

MASÛT — Zito là!

Stait cujez. Jo, quanche rive  
culî in plazze, alzi la man.  
L'è il segnâl che i spôs son donge,  
l'è il momènt di fà bacàn.

(Masùt, cun gran serietât, come un generâl, al passe  
in riviste lis sos trupis; e, fat chest, al si plante tal  
miez donge il pòz, pront a dà il segnâl. In chel Pau-  
line 'e volte 'l ciantòn. Masùt al dà il segnâl. Pauline  
'e reste senze peraulis, sole, denànt che' int che ciente  
e sdrondene).

CORO — Evive i nuvîz!  
Nuvîz clopadîz!  
Evive la spose,  
che' brute golose!  
Evive i nuvîz,  
nuvîz clopadîz!

MASÛT — Baste! Baste! Jè nome Pauline.  
I nuvîz no s'ai viôt a vignî.  
E i nuvîz dulà sono, Pauline?  
Su, fevele. Ce fàistu lí?

(Pauline si suje une làgrime. Masùt i va donge cu  
la cite da mièl). Ciare Pauline, scolte...

PAULINE — A mi, Masùt,  
a tu mi âs fate fà la batarele.  
Ce i ènrjo jo, se che' disgraziade  
di me parone 'e spose chel puar on?

MASÛT — Ma no par te...

PAULINE — Masùt, tu sês stât bon  
di fâmi, a mi, cussí une brute part?  
Tu vegnarâs a dími: ti vuei ben...

MASÛT — Ma sí, Pauline, jo ti vuei tant ben;  
e duc' lu san che t'an vuei tant, ma tant!  
Ance cumò modànt

ài diti a cheste int, domande tu,  
i ài dit che mi displâs  
che a capità la prime tu eris tu.

CORO — O ce bausâr! O ce bausâr!

TONI — Sí, sí, Pauline; cumò modànt  
Masùt l'à dit che i displâs tant.

MASÛT — Viôstu, Pauline, se 'o ti dîs bausie?  
La batarele a ti? Ma no, pardie!

PAULINE — Eh, lu sai ben che tu mi ciolis  
[vie.

Al è un piez che ti ciali:  
no, no tu mi ûs tant ben come une volte.

MASÛT — Ciare Pauline scolte:  
ti zuri che la colpe no jè me.  
Viostu, biele: spietavin  
i nuvîz e viodinti a capità,  
vin crodût c'al vignîs daûr di te  
chel pâr di culumbîns.

PAULINE — Va là! Va là!

I nuvîz? Dulà sono za a chest'ore?

TONI — Dulà sono?

PAULINE — No sai.

TONI — Sí, tu lu sâs.

PAULINE — No sai nuje. Son lâz adore adore  
in glèsie a celebrà  
chel benedèt di un sacramènt... e dopo  
cui sa là che son lâz?!

TONI — Tu tu lu sâs!

PAULINE — Zuri che no lu sai!

MASÛT — Tu tu lu sâs!



PAULINE — Masùt, c'ò mueri in bote!  
TONI — La bausie  
i cor jù pal zarneli! Su, Pauline,  
conte ce che tu sàs.

PAULINE — Us ài za dit  
che no sai, che no sai e che no sai.  
MASÙT — Vedele là, vedele. Il fol' mi trai,  
se Pauline no sa dulà che son.  
Ah, tu doventis rosse?  
Ma su, Pauline, senze piardi timp,  
conte ce che tu sàs. Se no, t'al zuri  
denànt di duc', jò no ti ciali plui.

PAULINE — Ma no, Masùt, ti prei...  
MASÙT — T'al dis; mai plui!  
PAULINE — Masùt, 'o ti vuei ben...  
TONI — Viôt ben, Pauline,  
che ce c'al dis al fàs.

PAULINE — Scolte, Masùt...  
MASÙT — No vuei sintí plui nuje.  
PAULINE — Inalore us dirai...  
CORO — Brave, Pauline!  
PAULINE — Ma... marcomandi!

TONI — No sta a vé fastidi.  
Conte, Pauline, ché tu sês tra amis.  
MASÙT — Brave, Pauline!  
PAULINE — Ma prudènzie, ve'!  
Ché se no, lu savês, puare mai me!

Arsere in t'une ciàmare  
sintâz sun dôs poltronis,  
chei dôl veciùz 'e stavin  
contansi gran robonis.

« Miò curisìn, ce pènsistu?  
A Udin o a Triest?  
La prime gnòt, ti pàrje,  
vin di fàle cun sest. »

E jò, fasint la stùpide,  
— 'o durmivi par fente —  
sintii done Veròniche  
a dí dute contente:

« Par fàle in pàs e còmude  
Udin jò scielzarès.  
Dal rest, 'o vuei rimètimi...  
co si è tal jet l'è instès. »

La conclusion jè pràtiche:  
son lâz... o cà... o là.  
La batarele è inùtile:  
vait a ciase, vait là.

CORO — O ce disgràzie! Ce brut ingian!  
Cui s'e spietàvje?... Ma tornaràn.

MASÙT — Lassait che càpitin chei culum-  
[bìns,

vin di ricèvju cun chesc' viulins.  
CORO — Oh, quanche tornin chei culum-  
[bìns,

farin la mùsiche cun chesc' viulins.  
PAULINE — Tornait a ciase duncè... e no  
[tradimi.

MASÙT — Sta sigure, Pauline...  
e perdònimi, tu che tu sês buine.  
(Pauline no po' stà cujete e bute ogni tant une  
ociade a gestre par viodi se vegnin i siei paròns).

PAULINE — Sí, ti perdoni... ma...  
MASÙT — (Chestè so fùrie  
no mi plàs trop). Ce ciàlistu, Pauline,  
vie par che' strade?

PAULINE — Oh, nuje. Orevi dí  
che tu menàssis vie che' int culí.

MASÙT — Jè pi furbe che sante! (T'une  
orele a Pauline) Ben, Pauline,  
jò compagni i amis  
e po', torni a ciatàti.

PAULINE — Stamatine  
no mi vanze un minùt. Torne stasere.  
MASÙT — (Ài capìt! Tornarai prin di stasere).  
Mandi, Pauline. Anín, amis. Par ué  
la vin biel che petade.

PAULINE — Silafé.  
(Jentre in ciase. La int 'e va vie ciantànt. Il coro  
al si slontane a pôc a pôc).

CORO — Oh, dibànt lis vin piardudis  
chestis oris di durmí.  
Ma co tòrnin, àn di viodi,  
àn di viodi e di sintí!

Vie, tirinsi duc' a ciase,  
su, tornín duc' a polsà.  
Quanche vegnin, quanche tornin,  
vin di fàju zavarià.

(Apene lâz vie, Pauline 'e torne fûr contente e beade.  
Dí lí a un pôc si sintarà, un fregul distànt, la vòs di  
Masùt c'al torne a viodi di je).



PAULINE — Son lâz. Oh, ce furtune!  
Ma ài savût fà, ài savût.  
Ance lui l'â crodût,  
e l'â bevude!

E se 'l Signôr ju jude,  
ju spôs e rivaràn  
senze nissùn malàn  
insìn a ciase.

Ma ce fâsjo culí? Ce mi piârdjo cussí?  
Ce mussate che 'o soi!  
Quanche tornin chei dôî,  
berlaràn: cenoné, ísjel fât chest cafè?  
E 'l deàn, invidât, capitànt senze flât,  
al dirà: cenoné, ísjel fât chest cafè?  
(Si sint la vòs di MASÛT).

Primevere benedete,  
mari sante di ogni flôr...  
PAULINE (spauride) — Jè la vòs di Masùt!  
MASÛT (l'è par rivà).

... d'ogni etàt e d'ogni sorte,  
duc' cumò van in amôr.  
PAULINE ('e fâs par s'ciampà) — 'O sciampi  
[vie!]

MASÛT (la ferme, jentrànt in chel).  
No, culumbine biele, no si s'ciampe,  
quanche al rive 'l morôs.  
(Masùt la ten pe man; je 'e tente di dismolàsi).

PAULINE — Masùt, ài presse...  
à tant cefà... ma tant! (Jesumarie,  
se vignissin!)

MASÛT — Mi pâr dut l'incontrari.

PAULINE — 'O scuen là.

MASÛT — Un momentìn. Dami un basìn.

PAULINE — No ài timp.

MASÛT (ciapanle traviars la vite) — Dami un  
[basìn.

PAULINE — Nostà tociàmi!  
Jú chês mans! (Lui l'ubidis) Cà la boce!

MASÛT (ciapanle strente e bussanle) — Oh,  
[curisìn!]

(Dismenteansi ducidôi des incombenzis che àn, si  
tegnin strenz e ciantin).

IN DOI — Cu la me boce su la to boce  
restà, par simpri, cui vôi tai vôi;

tigníti }  
sintími } strente, strente, vicine  
senze impensàmi dulà che 'o soi!  
Oh, ce delízie grande e divine,  
vé sole un'anime e sedi in dôî!

PAULINE (distacansi) — Baste cumò. 'O  
[scuen là.

MASÛT (tigninle strente) — Tu âs di contàmi  
là che son i nuviz.

PAULINE — No sai.

MASÛT — Ma dimi:  
culí tu tu spietavis qualchidùn...

PAULINE — Tu falis. (Tente di sciampà vie).

MASÛT — No, Pauline. Tu âs di dimi  
là che son.

PAULINE (cedint, sot vòs) — No i al còn-  
[tistu a nissùn,  
se t'al dis?

MASÛT — Sono in glèsie?

PAULINE — No lu sai.

MASÛT — Sono in glèsie? (Masùt la alze  
pal bərbìn e al si plee a bussàle. Pauline e cèt).

PAULINE — No sai.

MASÛT — Sono là?

PAULINE (senze vòs) — Sí.  
(Po diventànt da gnûf parone di sé stesse, si di-  
stache di lui).

Ma mòlimi. Ài premure. L'è il cafè  
di preparà. L'è târt. Puare mai me!

MASÛT (bussanle ance une volte)

Va là, ninine, che ti vuei tant ben.

(Pauline e jentre in ciase. Masùt al ciale drentri  
pal portòn; po', vidinle sparí, al si free lis mans).

MASÛT — Porete! E jè restade cussí flape  
e à molât il segrèt.

T'un lamp o met insieme la me clape  
e la meni cà drèt.

Mùsiche turche, fieste di baldòrie  
par chei dôî culumbins!

Dute la vile 'e à di sedi in glòrie,  
fantâz, ùmin, frutins.

(Al va vie ciantànt).

Che' bociute cussí fresce  
chei doi vôi come 'l ciarbòn;  
'o starès matine e sere  
a adoràju in zenoglòn.



## SECÒNT QUADRI.

La piazze 'e reste ueide par un momènt. Po' jentrin, ciaminànt a plancùt, sar Blàs e done Veròniche.

BLAS — Chesc' dôi tre dis, ciare, che inmò  
[nus restin,  
vin di passàju in pâs e in caretât;  
un donge l'altri, t'une ciamarute  
cialde di unviâr e al fresc tal ort di instât.

VERÒNICHE — Jo dut l'amôr e dutis lis  
[mes curis  
us puartarai incuintri come sùr.

E vo mi stimarês come un bon fradi,  
e al vuestri cûr rispuindarà il miò cûr.

IN DOI — Se jè curte la vite, 'o vin di fàle  
biele di pâs, di contentezze e amôr.  
Sin tal autùn de nestre puare vite,  
ma ance di autùn al sponte qualchi flôr.

(L'è jentrât intànt Tite, cidin cidin, e al è stât a  
sintí chesc' duet, riduzzànt).

TITE — Ce si fàse chi te strade?  
Sono scàndui chesc' di dà?  
T'une ciamare sierade  
chesc' duèz si puèdin fà.

(I doi viei restin lí malapajâz. In bon punt 'e  
rive Pauline).

TITE — No intindevi nominghe di uffindius.  
'O scherzavi... Mi pâs che si po'.

PAULINE — Sior deàn, lui l'è simpri di voe.  
I va ben: no si po' dí di no.

TITE — Tu, petègule, puarte prudènzie,  
e parece pitòst il cafè.

PAULINE — Sior deàn, no covente c'al disi:  
'o sai ben ce c'al è il miò dovè. (Vie).

TITE (compagnanle cui vôi)

Ce lengate! Ma grazie and'à tante  
che inamore; e la vinz simpri je.

(Tiransi donge i veciüz):

E ben, amis: seso contènz?

BLAS — Jo, sior deàn, soi contentòn.  
Il matrimoni tra i sacramènz  
al è 'l pi just, al è 'l pi bon.

TITE — Done Veròniche, che scolti mo':  
isje contente?

VERÒNICHE — Siôr deàn, sí.

Cui pi feliz, domandi jo,  
di chesc' veciüz in cheste dí?

TITE — Tal cialdüz, cujetüz, sot la plete,  
ce delizie, ce gust, ce plasé;  
e sintí quanche 'l vint al busine,  
ce delizie, ce gust, ce plasé!

IN TRE — Tal cialdüz, cujetüz, sot la plete,  
ce delizie, ce gust, ce plasé;  
e sintí quanche 'l vint al busine,  
ce delizie, ce gust, ce plasé!

(Si sint, pôc lontàn, a sdrondenà e, framiez chel  
davoì, a sberlà:)

Evive i nuviz!

(I doi puars veciüz restin un momènt senze pe-  
ràulis. Po' si mètìn ducidôi a clamà Pauline. Ance  
sar Tite al clame).

BLAS — Pauline!

VERÒNICHE — Pauline!

TITE — Pauline!

PAULINE (di stant sul barcòn) — Oh! Ce su-  
[cèddjal mai?

BLAS — La int...

VERÒNICHE — Jè culí...

TITE — Si vicine!

IN TRE — E se nus ciatin, guai!

PAULINE ('e ven fûr e, sintint chel davoì, e berle:)  
— In ciase! In ciase! In ciase!

(Te confusion sar Tite al ciape pal braz done Ve-  
ròniche e la strissine in ciase, sierànt daûr di sé il  
portòn e lassànt di fûr sar Blas e Pauline).

PAULINE (inrabiade) — C'al viarzi, sior deàn!

BLAS — Ma, sior deàn, c'al scusi...

IN DOI — Culí nus ciataràn!

(Pauline, vidint che Tite nol sint, e ciape pal braz  
sar Blas e s'al strissine tal portòn di une ciase di  
fazze. In chel, come un seòn, 'e plombe in piazze  
dute la comitive, Masùt a ciâf. Gran davoì).

MASÛT — Baste! Stait a scoltàmi un mo-  
mentìn.

Vin di viodi se son o no rivâz.

(Duc' ubidissin. Lui al clame cun delicatezze):

Pauline... Paulinute... Curisin...

(Po' al prove di viarzi il portòn de ciase di done  
Veròniche. L'è sierât.)

No si po' viarzi! 'E son drenti, sierâz!

CORO — Primevere benedete,  
mari sante di ogni flôr;  
ance i viei cumò si movin,  
ance i viei van in amôr.



MASÛT — Fûr i nuvîz!  
CORO — Fûr! Fûr! Fûr!

(Si viôt a spuarzi dal barcòn di done Veròniche un ciâf. Sul prin momènt crodin che sedin i nuvîz. Ma si persuadin subit c'al è il ciâf di sar Tite.)

CORO — Evive! Evive! Vive i nuvîz!  
MASÛT — Oh, l'è sar Tite! Cumò si friz!  
TITE — Ah, canajòz! Birbànz! Cui us [insègnje

a fà dut chest davoì tal miez de plazze?

E no si vergognais?

MASÛT (viars i soi compains)

Digo! E ce razze

di complimènz c'al nus fâs siôr deàn.

TITE — Tas tu, carogne! Strophe che' bociate e impare a vé rispìet de me gabane!

E voaltris duc', se 'o vès la giambe sane, savarès fàus filà t'un colp di man!

MASÛT —, Ma sior deàn, c'al scusi:

no fasìn nie di mâl.

E o ài, che 'l fûc mi brusi, cuscienze nete auâl.

TITE — Eh, tu galiòt, tu sês il caporiòn.

'O ti cognòs. Tâs là. Viôt di stà bon.

TONI — Orìn viodi i nuvîz, orìn ciapà i [confèz, e fàur la batarele come c'al è par lèz.

TITE — Ma i nuvîz, carognatis, ce crodeso che sedin cà a spietà lis malegrazis che savès fà voaltris? No saveo che son lâz vie lontàn?

TONI — L'ûl menànus pal nâs lui, sior deàn.

MASÛT — Fûr i nuvîz!

CORO — Fûr! Fur! Fur!

TITE — No capîso furlàn? Corpo di diane!

Co us dîs jo che no son, crodit: no son.

Vait a ciase! Oh, se 'o vès la giambe sane, no starès sul barcòn!

TONI — C'al nus disi pitòst dulà che son.

TITE — Vès di capile,

brutis carognis,

che in cheste vile

lôr no son plui!

TONI — Vino di crodi ce c'al dîs lui?

TITE — Carognis! Ogni biel bàl al stufe.

Di fà barufe

no ài voe plui jo.

Se orès mo' crodi,

crodit; se no,

stait a spietàju...

Vegnìn cumò.

E ualtris, femenatis, ce faseso

cun tanc' impresc' e tananais in man?

E ce vergogne! Vait subit a ciase!

Ce sono chestis storis, chest bacàn?

No veso un omp c'al vedi i bregòns ròz,

o c'al rompi lis cialzis sul telòn?

No veso pitinìns che 'e fan tes fascis?

Jè ore di finile, corponòn!

Duquànc' sarès danâz, sarès danadis

a cont di chestis vuestris baronadis!

(Sar Tite al sparìs. La int 'e reste a boce viarte. Un pòs si vòltin a cialà Masùt, come spietànt c'al dedi spiegazion).

TONI — E ben, Masùt, ce distu?

MATÛT — Ce che 'o dis jo? Ce si àe, ce si àe di dí? 'L deàn l'è un canajòt, l'ûl dånuse d'intindi.

TITE (furiòs, dal barcòn) — Une canae tu saràs tu, lengate, tu saràs!

TONI — Àstu capít, Masùt? Tèntile e tâs.

TITE — Saveo ce che us dîs? Stait a [scoltàmi.

(Viars Masùt).

Tu impararàs, galiòt, a rispìetàmi.

Chel che us 'e dà d'intindi

l'è lui, chel slengonàt.

Jè dute la matine

c'al zire, c'al muline,

che us mene in zîr pe vile.

Us ciol pal cùl, l'è un fât.

MASÛT — Sior deàn, sior deàn! C'al vei [prudènzie,

ché guai se 'o rivi a piardi la paziènzie!

TONI — Masùt, l'astu sintude cheste acuse?

TITE — Vedélu là, vedèt, ce ròs in muse.



Intant che duc' voaltris  
 'o stavis cà spietànt,  
 chei dôi 'e son lâz vie  
 passànt pe sacristie.  
 Son montàz in carete,  
 e vie lôr galopànt!

MASÛT — Sior deàn, sior deàn! C'al vadi  
 [adasi...  
 c'al pensi ce c'al dis. Lu prei, c'al tasi...]

TONI — Masùt, ce dîstu tu!

MASÛT — Jo soi sincir.  
 L'è 'l deàn c'al ul fàus cumò un brut fir.

TITE — Sintît ce c'al à fàt? Us al dîs jo.

MASÛT (piardint la paziènzie) — Ma sior deàn!

TITE — Tu tâs?

MASÛT — Oh, chest po' no.

TITE — Lu àn comprât!

CORO — Isje vere?

MASÛT — No jè vere!

TITE — L'è dacordo cun lôr!

MASÛT — Jè une bausie!

TITE — L'è dacordo cun lôr!

TONI — Masùt, fevele:  
 sêstu propri dacordo?

MASÛT — No pardie!

TITE — Vedês che nol à scusis!

CORO — L'è dacordo!

MASÛT — Us al zuri: il deàn  
 al dîs il fals!

TITE — I àn dât la buine man!

MASÛT — No! No! Lassàimi sta!  
 (Cui lu ciape pai braz, cui pe camisole: duc' son  
 intôr di lui. Masùt l'ûl liberàsi ma nol po'. Sar Tite,  
 in alt, al rît, c'al si scocone).

TITE — Tignîlu strent.

TONI — Masùt, isje mo' vere?  
 che i nuvîz son sciampâz vie pes scuindudis?  
 Che ti àn dât bêz? E che tu tu ju judis?

MASÛT — Molàimi! No jè vere. Soi inocènt.  
 Molàimi! No tignîmi cussî strent!

TONI — Conte la veretât; po' ti molîn.

MASÛT — La veretât l'ài dite e torni a dîle:  
 i nuvîz no son lâz fûr di ste vile.

TONI — Dulà, po'?

MASÛT — Ce sào jo?

TONI — Anîn, anîn!  
 Se tu ûs passàle lisse, conte fûr:  
 ti àno pajât?

MASÛT — Jè une bausie!

TONI — Finis  
 di neà. Sior deàn, isjel sigûr  
 di ce c'al nus à dît?

TITE — Ma si capîs.  
 Pensait che lui l'è 'l morôs di Pauline  
 e Pauline jè serve in cheste ciase.  
 Dacordo ducidôi, ué di matine  
 ju àn judâz a sciampà.

PAULINE (di stant sot il portòn) — No! Nol  
 [è vèr!]

CORO (cialansi intôr senze capî di dulà che ven  
 che vòs) — Pauline!

TITE (tra di sé, brundulànt)  
 Moschetade! 'E mi ruvine  
 t'un bôt dut il miò plan.

MASÛT (cialansi intôr ance lui) — Ven fûr,  
 [Pauline.

TITE — Badait che nol us sciampi fûr  
 [di man!]

MASÛT — Pauline me, tu sole  
 tu sâs la veretât.

Ven fûr, ti prei, e conte  
 a duc' ce c'al è stât.

CORO — Ma dulà isje duncè  
 che lasse in blanc cussî chest so morôs?

MASÛT — Pauline, 'o ti domandi  
 scuse... se ti ài ingianât.

Jùdimi tu, ven, conte...  
 Viôt, Pauline in ce stât..

PAULINE (daûr il portòn) — Masùt, no puès,  
 [no puès...]

(La int daûr la direzion de vòs di Pauline, si ferme  
 denant chel portòn, là che son scuindûz Pauline e  
 sar Blas).

CORO — Ce sunsûr! Ma ce sucèdje  
 lí daûr di chel portòn?

PAULINE (simpri daûr il portòn)  
 C'al mi lassi che feveli!  
 C'al mi moli, siôr paròn!

TONI — Jè Pauline che fevele;  
 jè cun t'un che i dis paròn!

MASÛT (piardint la paziènzie)  
 Ma ce staiso lí a cialàlu  
 chel portòn? Su, basoi,  
 rebaltàilu o ben lassàimi:  
 jo bessôl lu viarzarai.



(In chel che Masùt al tente di dismolàsi, il portòn al si spalanche e si viôt a saltà fûr Pauline dute rosse e dispetenade. Sar Blas, ance lui fûr di sé, al jès dopo di je. Il deàn, a viòdju a saltà fûr, al siere in presse il barcòn e al sparìs. Il Coro, ridint e berlant, al fâs un bacàn dal diaul, balant e saltant intôr dai dôî malcapitâz. Qualchidùn al jentre tal portòn in cerce di done Veròniche, ma al torne fûr cu li pivis tal sàc. Dopo pôc la int si cujete).

TONI — E ben, Pauline biele,  
cumò tu âs di contà la veretât.  
Masùt èrjal dacordo?

Par menànus pal nâs, ce àel ciapât?  
PAULINE — La veretât si sta pôc a contàle.  
MASÙT — E jo soi inocènt. Stait a scoltàle.  
PAULINE — Co sês lâz vie ué di matine,  
Masùt, chel furbo, l'è tornât cà,  
e cun mignògnulis 'e so Pauline  
i passaràz al i giavà.

Quanche la stòrie lui l'â savude,  
« Mandi Pauline! » e al mi plantà;  
Oh, ce paure, amis, c'o ài vude!  
Ma pûr speravi di cumbinà...

CORO — Conte, Pauline, stin a scoltà.  
PAULINE — Eco che vegnin cu la fiacute,  
Eco c'al càpite ance 'l deàn;  
eco si fermin su la plazzute...  
ma in chel si sint un gran bacàn.

Son cà! Sar Tite al mude ciere;  
done Veròniche... la ciape e po'  
la tire drenti e — punf — al siere  
biel il portòn, sul nâs a no.

CORO — Ce cavalir! Pauline, e po'?  
(Sar Blas intant al bute qualchi ociade sui barcòns  
di done Veròniche; ma nol viôt nissùn).

PAULINE — Il suplicàlu no zove nie;  
done Veròniche nance no sint.  
E jo inalore, par sciampà vie,  
ciapi 'l nuviz e vie curint!

'O m'al strissini traviars la plazze,  
e ce fadie! za duc' m'intint;  
e 'o viôt te ciase culf di fazze  
viart il portòn... e lí mi scuint.

CORO — Brave Pauline, tu âs fât benòn.  
Masùt, tu puedis tigníti in bon.

TONI — Siché Masùt nol à colpe di nie?  
MASÙT — L'è 'l deàn c'al à dite la bausie.  
TONI (a Pauline)

Siché done Veròniche jè là?  
MASÙT — E chest l'è 'l biel che no po'  
[plui sciampà.

TONI — Done Veròniche, che salti fûr!  
Vin voe di viòdile cun dut il cûr.

(Si tirin donge 'l portòn di done Veròniche. Masùt  
ju ferme).

MASÙT — Sintit, amis. 'O sai che chest  
[portòn

nol si viarz se 'l deàn nol è sigûr  
dal so fât. Nol è den dal miò perdòn,  
ma vie, sin generôs: i al doi di cûr.  
TONI — Sior deàn, sior deàn, l'è perdonât.  
CORO — In fin di ben l'è stât ce c'al è stât.

TITE (viarzint il barcòn in sfese)  
E Masùt... e Pauline... mi perdònino?

(Une ridade di gust jè la rispuete dal popul a  
cheste domande. Pauline e Masùt i berlin sù):

IN DOI — L'è biel che perdonât.  
TITE — Alores 'o ven  
a viarzi. E grazis tant.  
MASÙT — Amis, jè l'ore  
de batarele. Viodit di fà ben.  
TONI — Benòn, Masùt. Cumò nissùn  
[nus ten.

(Si spalanche 'l portòn; 'e vegnin fûr sar Tite e  
done Veròniche. I nuviz, dopo che lunge separazion,  
si abràzin e si büssin. In chel al scomenze un bacàn  
dal diaul, e 'l popul, sbatint i siei strumenz, al si  
mèt a balà intôr dai nuviz che restin bessôi tal miez.  
Pauline, Masùt e sar Tite jentrin in ciase).

CORO — Primevere benedete,  
mari sante di ogni flôr;  
di ogni età e di ogni sorte,  
duc' cumò van in amôr. } I.

Ance i viei cumò si mòvin,  
ance i viei van in amôr. } II.

(Càpitin indaûr Pauline, Masùt e sar Tite, puartant  
bocai di vin e une guantiere di tazzis. Si ciente, si  
bêf, si rît, si fasin svualà par ajar ciapie e fazzolèz.  
Il deàn al còr di un al altri par cujetâ che int, ma  
nissùn lu scolte).



CORO — Evive i nuvîz!  
Evive i nuvîz!

(Si torne a fà un circul intôr dai nuvîz e tal circul  
'e restin ciapâz drenti ance Masùt e Pauline e, in  
bande, ance il deàn. Po' si ciente e si bale).

CORO E DUC' — Tal cialdüz, cujetüz, sot  
[la plete,  
ce delizie, ce gust, ce plasé!  
A sintí quanche 'l vint al busine,  
ce delizie, ce gust, ce plasé!

JÙ 'L TENDÒN.













